



南樓吟



豪

有華書熟

古之女子類能詩蔡人妻之芣苢周南大夫妻之
汝墳申人妻之行露衛宣夫人之柏舟定姜之燕
燕莊姜傳母之碩人伋傅母之二子乘舟息夫人
之大車見諸傳記與雅頌並垂然皆憂時嗟亂傷
心感疾懽愉之辭少而愁歎之音多哀思慘戚有
令人不忍卒讀者夫天旣生是人豐其才而屯其
遇當時悲之千百世以下其悲之是獨何爲者耶
豈所謂命耶抑數使之然耶天亦不得而自主耶
吾觀世之蓬頭鬢耳齟脣歷齒之屬手未觸書史

目不辨朱碧擁金玉矣被禴狄矣育子姓而饗壽考矣彼所謂茂美嫻篇章者非嫠卽獨非寒下卽婁甚且愁病困躓以至於蚤隕是詩者不祥之物也徐媛若冰余弟子也性慧喜稱詩善病多愁年三十五而死死之日以遺稿數百篇屬爲刪定往來奔走卒卒無暇今春始得刻於廣陵蓋存者什之四三焉若冰才雖不及古人而嗜詩則篤其生之不辰命之不長未必非詩有以致之是詩者果不祥之物也然彼富貴壽考者卒與草木同腐而

貧病蚤死若徐媛幸有所遺之詩庶幾竊附於芑苴墳之義論世之君子當不以此而易彼也則吾之悲其亦藉以少紓也夫

乾隆三十年旃蒙作噩之歲日在翼雲間沈大成

昔吾郡楊鐵崖先生以詩名聞天下製西湖竹枝
詞和者凡百餘家獨薛氏蘭英偕其妹蕙英以爲
東吳自有竹枝因作詩十章單行側出於世鐵崖
見之至爲咨嗟吟賞不置迄今垂五百年風流標
舉旣尠鐵崖之好事者而閨襜名淑遺徽頓盡亦
可以尙論而興慨也已吾友青崖孔君之配徐媛
若冰夙嗜吟咏所撰南樓詩若干卷選事必新攷
詞必雅泓然瀏然不苟爲柔橈靡曼之習殆繼蘭
蕙聯芳之風而興起者與雖然薛氏生長東吳所

見諸詩者山則虎邱宮則館娃臺則姑蘇稍寥遠者亦止太湖洞庭笠澤焉爾若徐媛從其良人僑居西泠藕花之居放鶴之亭鳳林之寺環映左右春秋佳日烟篷雨櫂延緣遊覽鐵崖竹枝所歌之風景博聞而習觀之既歸於吳凡薛氏所見諸詩者又靡不遍歷焉間以其暇鉤簾瀆墨標新鬥異六橋之烟柳與夫三百六十之紅闌綠浪交發並見於名章秀句之中宜其詩之工也豈薛氏所敢望與今海內閨襜之以詩稱者於維揚則許太夫

人淥淨於武林則方夫人芷齋芷齋之詩之刻於吳中也屬余爲其校定而許太夫人亦嘗以淥淨前後集見示顧皆於徐媛題衿結契爲文字之交長箋短咏詩筒雜遝又豈如薛氏之僅以姊妹共倡和者與余曩日偶倡爲山塘雜詩海內名雋爭相屬和徐媛亦和詩六章以余之禱昧不足擬於鐵崖而徐媛之詩又過於薛氏遠甚乃不欲單行側出而雅托於繼聲是余所得較鐵崖有多焉者尤可幸也鐵崖之題薛氏詩卷也曰好將筆底春

風句譜作瑤箏弦上聲讀南樓之集者亦當於此
焉求之已矣乾隆丁丑仲秋青浦王昶琴德序

南樓吟稿者香溪若冰夫人之作也高秀夙彰徽
華早茂玉將溫而比德蘭初佩以含芳顧氏夫人
兼擅大家之譽左家嬌女偏工幼婦之詞故夫雲
母窗深水晶簾冷一雙翡翠常栖夢筆之牀千片
芙蓉每落掃眉之鏡是以回文錦字漸滿香奩半
格花箋已盈繡笈況復偶遊明聖人對湖山舊住
姑胥家隣烟水鹿車挽罷卽事縹緗鱸膾供餘便
耽研削美人麗玉謂芷齋夫人林下盤桓仙子飛瓊謂清夫人
雲端翰札香燈小社託豪素以題襟花月深

宵話水天而接席莫不形諸歌咏盡得風流約有多篇編來成卷枝枝是玉如探璧水之源片片皆香宛入瓊花之圃余也老修淨業久厭塵勞小閣調脂已忘昔夢廣庭飛絮有似他生迺於茹齋繡佛之時忽得刻玉鏤冰之句掩班姬之團扇正值秋風對漢女之明珠沉臨皎月溯源東海一勺分甘凝睇南樓八窗同夢誰爲常璩亟登彤管之編家有徐陵好續玉臺之詠戊寅中秋先三日錢塘淥淨老人德音序

烏嘯此吾姪孫女若冰之遺詩也吾姪錦川祇一女倚以送老中道而殞聞其沒者無不悲之況至親若余把其詩而思其平生乎若冰性慧而才敏幼喜讀書女紅婦事之餘卽拈翰苦吟後在西泠會雲間沈沃田先生來遊見其詩錄爲弟子自得指授格律一變駸駸乎窺作者門庭矣惜其體羸善病年僅三十餘而卒苟天假之歲月益得肆力於篇章其所造當不止是豈造物者故靳之與何予之才而奪之壽與若冰臨沒寄其所爲詩乞先

生選刻今年春始刻於廣陵而寓余序之余哀姪
孫女短折無嗣賴此數十篇之詩尙存人間使後
世知有徐氏女而尤感先生義高不欲死其弟子
也烏噀草封淺土魂氣安之香冷鼓編音徽未沫
念白髮之無依歎皇天之何酷傷哉惻矣聊題數
語以復先生并慰錦川云乙酉中秋前三日仙嗟
老人書

徐媛傳

雲間 沈大成 學子 撰

徐媛名映玉字若冰蘇之崑山人父錦川翁始遷
郡城媛嫁孔氏從良人僑居浙久之遷吳徙香溪
上年三十有五以疋卒媛幼警慧柔嫻靜莊喜讀
書稱詩巧緘縷佩服櫛珥必修潔初生時母夢梅
花一枝墮於庭長而愛梅句花開行吟其下每風
雨至顧而泣若有傷於心者家人竊怪之父善奕
媛旁觀覆不失一學琴得虞山指法旣嫁曰此非

婦人事也遂輟不爲其父母以無子依壻居媛奉
舅姑處娣姒遇宗鄙嫺戚內外無間言不以親在
夫家爲嫌也甲戌春余遊武林見媛梅花詩偶爲
更訂數字媛見之喜曰此真吾師也遂來問業稱
弟子蓋至於今年余往來吳中館其家嘗留惠
徵君松厓飲媛入廚治具或以爲腆曰吾重惠先
生之經學也它日戚有爲縣者飯其舍或又以爲
儉曰若徒知取科名耳安得儕惠先生哉烏嘑世
惟崇勢位趨財利矣媛一女子能審輕重若此其

識豈不出於尋常萬萬哉媛自學於余漢書楚辭
文選古樂府歌辭皆成誦能通其義間問偏旁調
反切習筆算每見余行篋善本書必借得挑鐙校
勘祁寒盛暑勿恤也然其生平多愁善怨俯仰太
息中鬱鬱不自得用是疾作更三稔滋劇將死泣
顧父母曰兒命薄死無憾惟吾親之養不終銜恨
入地耳烏嘑其可哀也已媛有一女蚤天生雍正
戊申三月十一日沒乾隆壬午十二月晦旣歛庭
梅及盆盎所蒔者一夕萼盡脫家人驚歎以爲平

時顧而傷心者蓋預徵也其所爲詩有南樓吟藁若干卷

贊曰昔南豐曾氏之志周夫人以其喜書史好爲文章日夜不倦如學士大夫有詩七百篇年廿有六而卒媛之詩不逮周之多而好學刻苦與周同然周膺冠帔育裔嗣而媛賦命不辰終以幽憂致疾死何遇之相懸若此也烏噉豈非天哉

南樓吟稿目錄

卷上

雨中懷鄧尉梅花

題夢母圖

憶亡女麗娟

寄懷高表姑母

懷吳江表妹張端英

午日

夏涼

七夕

閨緒

別端英妹

贈松陵周二夫人

夏日閒居

立秋

寄呈大人

長楊宮詞

秋夜

甲戌送春日奉題沃田師湖上雜詩

西爽閣

贈錢塘芷齋方姊

中秋無月

思歸

登吳山文昌閣見沃田師題壁

奉和沃田師廣陵客館見寄之作

乙亥深秋病起

感懷

送耐亭表丈之豫章 南樓授詩圖承江左

名宿暨廣陵淥淨許太夫人題句感而爲賦

山塘雜詩奉和王蘭泉舍人韻

次許太夫人題南樓授詩圖韻

題王蘭泉舍人三泖漁莊圖

代寄女兄

題錢塘陳姊如璋寄

外詩後卽次其韻如璋亦沃田師弟子也

贈青浦許雲清夫人 畫魚

寄外

梅魂

寄懷雲清夫人

自悟

依韻寄答雲清夫人 七夕寄外

讀王蘭泉舍人履二齋詩集作

中秋

秋夕

秋日得端英表妹詩 古織錦詞

對月有懷雲清夫人 冬怨

代書寄外 冬夜有感

丁丑除夕 戊寅元旦

梅花 雨窗

初春偶題 偶至小園見玉梅一

本雜於榛蕪之中喟然有感

和外武林客館見寄 春曉登樓

寒食 惜春

春日 落花

春莫遣興 春盡日

送雲清夫人入都 贈外舅母王太夫人

自題石欄點筆圖 苦雨

雨不絕 喜晴

夏日閒居

卷下

春日偶成

奉酬誠齋從父

讀雲亭弟新咏

沃田師寄示詩集

奉酬雲清夫人即次見懷韻

秋夜有懷端英妹
望鴻偶作

同雲亭弟讀張澄川詩集

與雲亭弟論詩
程氏園十詠

靜香春晝

水亭坐雨

霜鐘度月

遠山眉嫵

塢影斜陽

遙村鶴唳

古檜龍蟠

桂林秋曉

牆角風帆

石室堆雲

奉和沃田師送春二絕句即送之廣陵

送雲亭弟應試鹿城
病甚承雲亭弟寓書

慰問并寄長篇輒濡藥汁亦成三十韻答之

病中遣興
寄懷許雲清夫人

題虞山女史牡丹
養疴雜咏

酬誠齋從父
梅花

雲亭弟相訂論詩以雨不果賦此以寄

送雲亭弟赴閩中
和錢塘方芷齋詠梅

絕句
秋月奉和六叔祖

秋夜對月有懷雲亭弟及端英妹

雲亭弟在閩作此寄懷

和雲亭弟秋夜見懷韻

苦雨有懷雲亭弟喜耀呈弟至書此示之

病起示外

壬午暮春送雲亭弟

之秦中

雲亭弟重客秦中寄

此懷之

次韻奉酬誠齋從父

次雲亭寄懷韻

永日

次蘭畹顧姑丈秋登月滿樓韻

病起呈誠齋從父

中秋對月作

從弟耀呈嘉禮

曉寒懷雲亭弟

鎧花

追輓葉孺人

秋莫有懷雲亭弟

余嬰疾纏綿篇章久

謝雲亭弟每貽新咏索和頻仍勉爲繼聲不

可云詩也

夢

表姑張鳳英花燭詞

誦芬樓詩用謝康樂

登池上樓韻

壽從大母王太君五

十

題月滿樓再次原韻

月下探梅有感
 范靜川姑丈之官梅
 州大人偕行入粵送別抒思奉呈四首

南樓吟稿目錄

南樓吟稿卷上

香溪 徐映玉 若冰

雨中懷鄧尉梅花

雨暗西山阻勝遊
 初春寒峭過深秋
 懸知翠羽嘈嘈語
 水驛江村正釀愁
 催花風信幾番過
 狼藉寒香可奈何
 柔櫓虎山橋外路
 柳邊牽網有漁蓑
 尋詩猶憶十年前
 縞袂曾逢萼綠仙
 今日綉窗愁聽雨
 挑燈洗句不成眠

銅井重遊定幾時年年常誤看梅期寄聲風雨休
相妬憑仗東皇好護持

題夢母圖

春風江上來濤聲夜入寺有客獨思親輾轉不能
寐起挑長明鐙盈把泔泔淚未晬去母懷音容邈
難記斯須玉鏘然夢母自雲際兒跪泣嗽詞襁褓
輒見背白雲空含愁視息亦何意旣寤寫生綃春
暉得彷彿迺知天屬親幽顯本無二哀哀臯魚心
有血滿圖繪吾愧殷氏姝作詞爲累歛

憶亡女麗娟

花房珠顆最堪憐埋玉深深忽十年眉眼夢中常
彷彿依然膝下與鐙前

寄懷高表姑母

一自辭閨範奄移十二春看花思玉質對月緬芳
塵蘇蕙才如錦班姬筆有神瑤編頰和女綵舞共
娛親妙曲聞瓊樹明鐙照繡茵謂諸侍妾卽看寫韻事
絕勝畫眉人但恨違江渚還愁隔漢濱香車何日
返離思頓教伸

懷吳江表妹張端英

念我愁多疾未安
八行頻寄勸加餐
何時重理胥
江楫紅燭青樽續舊歡

午日

垂垂艾綠出西隣
不覺年光半化塵
湘簟含風宜
病骨越羅疊雪稱
吟身閨中點勘常
侵夜湖上音
書動隔旬
時家君尙居武林
聞說胥江誇競渡
幾人投賦
弔靈均

夏涼

絕似深秋雨後天
微涼忽到小窗前
最憐紈扇無
情思未待西風早
棄捐

七夕

銀漢橫斜玉漏催
穿針瓜果飭妝臺
一宵要話經
年別那得工夫送巧來

閨緒

貼罷花鈿整繡衣
閑携女伴踏春暉
小姑穉齒嬌
癡甚遶遍闌干撲蝶飛

嫋嫋東風透碧紗
牡丹已吐十分芽
回闌亞字閑

百樹吟和卷一
三
憑徧手汲歎壺自灌花

慊慊倦理繡花絨撲面溫磨三月風分得新題閑
覓句朱絲斜映瑣窗紅

臨罷黃庭理素琴淥波一曲託冰心閨中誰是中
郎女解識鸞音與鳳音

別端英妹

西風瑟瑟感離羣愁覩長空雁影分今日花前同
把酒何時月底再論文一般往事隨流水萬種相
思托暮雲從此松陵牽遠夢閨檐膠漆鎮思君

贈松陵周二夫人

松陵傳得香閨語風調何殊葉小鸞媿我近來疎
紙墨竟無好句寫冰紈

烟波渺渺阻清芬咏絮才華自昔聞何日六萌來
茂苑熏香小閣與論文

狸毫鳳唵玉蟾蜍南面妝樓插架書閑共女君頻
點勘一時班謝有誰如

織女雲機仙子詩琴徽碁罽總相宜若教編入妝
樓誌合爲諸姬作大師

南樓賦卷一
四
幾番清夢接虹亭時節黃梅雨不停聞道閨中修
淨業蕭晨應說貝多經

夏日閒居

一枕蕉陰午夢時起綉絳帖學羲之愛渠窗外瀟
瀟雨暗送荷香入硯池

立秋

三十六陂紅漸凋池亭涼雨晚蕭蕭井梧一葉敲
簾額便覺深閨也寂寥

寄呈大人

寒月如霜下畫樓白雲南望思悠悠閨中有女空
相憶膝下無兒爲遣憂濁酒斟來難撥悶遠書裁
就寄何由晨昏愧乏供甘旨多病年來轉益愁

長楊宮詞

詔書先下右扶風猛獸齊驅熊館中西蜀郎官工
獻賦又傳子墨入深宮

習馬長楊徹曉開竦戎校武震如雷趙家姊妹晨
妝罷也逐星旃天畢來

秋夜

鼓動高城已四更小樓鐙炮月痕橫秋深病久難
成寐無賴寒蟲不斷鳴

甲戌送春日奉題沃田師湖上雜詩

西湖烟景最堪憐牽引東風泛畫船賦就竹枝詞
絕妙從今山水更增妍

春來未肯醉江樓暢作湖山三日遊持較會稽楊
鐵笛應輸家令擅風流

綠染雙隄柳漸長紅舷烏榜往來忙萬花湖上空
如錦那敵詩人一句香

到處留題屑玉塵酒罇僧院墨痕新棟花風過茶
靡放又引停車點筆人

西爽閣

夕陽高閣帶青蘿無限晴山入嘯歌更有倚闌堪
戀處雲屏題句大家多

贈錢塘芷齋方姊

林下芳名謝道韞閨中秀質顧夫人把君好句瓊
瑤似別有風裁迥出塵

若蘭才思擅回文吟罷令人齒亦芬風雅莫言閨

閣少稱詩幾輩得如君

明窗閑寫十三行架筆珊瑚玳瑁裝
媿我繡餘偏廢學半生愁病往來忙

蘆宮仙子謫凡塵爲有人間翰墨因
惆悵蘭舟將起舵未能香閣結芳隣

中秋無月

桂影婆娑怯早寒晚風瑟瑟露漫漫
素娥想亦多惆悵深鎖重雲不放看

思歸

頻年蓬跡寄杭州大好湖山取次遊
每欲束書歸故里爲憐西子又淹留

登吳山文昌閣見沃田師題壁

崔巍高閣連雲起彌望湖光入翠微
一自吟筇江上去空留妙墨冷斜暉

奉和沃田師廣陵客館見寄之作

歸權吳淞一水遙新詩頻寄雁鴻迢
迢定知客館多吟興明月簫聲廿四橋

荷花香裏錦帆徂又見枝頭梅蕊疎
排遣不教焚

南樓賦卷一
筆硯多生結習未能除

乙亥深秋病起

兼旬卧疾掩窗疏瘦比黃花更有餘目斷南來雲
際雁幾會繫得一行書

武林久無
良人音耗

重開鸞鏡施膏沐卷上珠簾怯曉風病起不知秋
幾許飛來黃葉滿庭中

感懷

峻嶒玉骨瘦如何嘆惜年光幻影過春事不堪愁
裏盡雨聲偏向病中多無才敢擬璇璣詠有怨空

吟紈扇歌背壁銓昏情黯黯雲邊同悵有姮娥

送耐亭表丈之豫章

覓句推敲指點頻驪歌忽唱暗傷神明朝欲問程
千里此夕須傾酒百巡高閣茗蕘思帝子好山窈
窕引詩人正逢江上芙蓉發涼雨香風浣客塵

南樓授詩圖承江左名宿暨廣陵淥淨許太

夫人題句感而爲賦

孰吟豈敢比昭華僥倖南樓挂齒牙好是百城烟
水外叅來字字妙蓮花

淶淨軒中一瓣香青雲幸得附姬姜
許太夫人為家清獻公女
何當金管傳佳句廿四橋頭去夢長

附書李義山詩後
玉溪菊涉方城樊川汜濫於元白吳韓諸家八音
繁會五色相宣意注筆翹詩境日闢要其真訣所
在不越摹寫情景摹寫情景之妙不越纏綿悱惻
細賦風光而已故夫情觸景生景因情立二相交
倚闕一則監唐音皆然玉溪生尤入三昧耳若冰
從予授詩西泠今秋自蕪城過吳憩南樓者一月
香鑪茗椀晨夕商榷一尺之鏡見千里影慧心妙
舌啟予實多其於玉溪生蓋有宿契若劉子儀畫
像寫詩之篤嗜者因取午橋是編畧第甲乙授之
至其箋注離合若冰捷悟自能區別毋俟荒言也
昔馮定遠有女弟子董雙成毛大可女弟子徐
昭華以若冰之才足以鼎立予則老多遺忘誦掃

失帚良媿二子云爾乙亥九月重陽後
三日將返谷水臨發書此沃田居士
附南樓授詩圖序
余與沃田兩人同志同研經學詩所得皆秘然不
得升堂之弟子授之沃田僅女弟子徐媛若冰一
人傳其詩學沃田因慨詩道榛蕪學詩者曾不得
其門而入獨若冰好學善悟遂傾其胸中之秘而
與之此南樓授詩圖所由作也余謂沃田曰二南
十五國之風半出女子之手班彪之息秦嘉之妻
謝遏之姊鮑昭之妹咸有集以行世古來巾幗類
能詩而罕通經故詩有傳人而經獨亾沃田曰是
不然昔河南女子傳說卦濟南博士女傳尚書緇
子駿嬪女傳左傳韋逞母宣文君傳周禮五經皆
女子所傳他日豈無好學善悟如若冰者從余兩
人受業而發其秘者乎余曰善適觀是圖即述余
兩人之言為之序乙亥歲暮東吳惠棟炙研書於
舟次阿

舟次阿

山塘雜詩奉和王蘭泉舍人韻

隄邊畫舫水邊樓
花落春衫柳拂頭
七里笙歌長不斷
曉鶯無賴一聲流

到處芳林足可娛
雨餘風定景偏殊
虎邱三月春光好
人在浮嵐暖翠圖

戎戎山市翳烟蘿
斟酌橋西柳影多
春晝畫船相次泊
瓊瑜小部拂雲和

一到春來碧草芳
美人黃土斷人腸
小桃花外纖纖月
依約蛾眉認女郎

深閨病起不知春
筆硯疎蕪倦繡身
聞說山塘遊屐滿
隔花多少綺羅人

冷食初過柳色深
春陰容易阻幽尋
幾時也放蘭舟去
去續花前長短吟

次許太夫人題南樓投詩圖韻

繡倦窗西理秘書
南樓寂靜宛山居
偶拈短句駢愁疾
敢並孤芳說二徐

玉屑紛霏不染塵
吟成新什壓才人
絳紗有意栽桃李
蚤晚相從結比隣

題王蘭泉舍人三泖漁莊圖

吟社傳王粲稱詩字字新偶依三泖隱不減五湖
春野艇隨輕浪精廬絕點塵承明虛席待未許作
閑身

圓鏡浮天白濃螺到檻青仙人服朮序高士養魚
經載酒花間醉鳴琴竹外聽慚無咏絮句爲寫入
雲屏

代寄女兒

屋角雪花寒漸積枝頭梅蕊暗生香擁鱸分韻無

蘭契翦燭論心憶雁行楚水吳山雖尙隔停雲落
日豈能忘耽書每惜韶華駛念別偏嫌歲月長卻
喜高堂強健在但愁遠道信音荒遣愁賴有琴三
疊撥悶聊憑書一牀拈就新詞遙寄姊荆南烟樹
永相望

題錢塘陳姊如璋寄外詩後卽次其韻如璋
亦沃田師弟子也

玉人望遠感深秋閨裏紅鐙天際舟爲憶藁砧腸
欲斷雁聲蛩語替君愁

銀河耿耿夜迢迢清夢依稀在緯蕭羨殺謝孃才
獨絕然脂弄墨度長宵

織得迴文託便鴻旅情閨怨卻相同應知一幅光
明錦淚滴珍珠字字紅

贈青浦許雲清夫人

花草精神獨擅場吟來句裏盡生香清新娟秀誰
能擬初日芙蓉一朵芳

龍標詩筆本天成

雲清夫子爲
王蘭泉舍人

況得飛瓊自玉京

弄墨然脂閑唱和一時新咏滿蓬瀛

烏皮香膩分牋翠鳳唼光寒卷墨濤珍重仙姝相

贈意午窗繡罷卽含毫

蒙以花箋
香墨見遺

澱山如髻隔清芬盈握珠璣宛見君月落參橫猶
入夢翠樓何日共論文

畫魚

蓮葉東西見媵鱗悠然唼荇更牽蘋非魚非我誰
能悟就裏須參濠上人

寄外

西子湖頭烟景蕭娘鑪伴鶯花對此儘堪排遣渾

忘久客天涯

隔院砧聲惹恨空庭蛩語牽愁堪嘆飄零遊子此時應未知秋

梅魂

冰肌玉骨自珊珊一種迷離向夜闌林下幽姿應惹夢水邊冷豔忽驚寒定知逸態難教畫渾覺清標未易看何計便能招卽返伴他殘月上闌干

寄懷雲清夫人

澗湖一水似瀟湘青鳥銜來雲錦章百番迴環微

妙句飛瓊端勝杜蘭香

無端愁疾歎纏綿藥裏關心冷硯田想得茂漪多雅興彩毫時拂浣花牋

梅子黃時連日雨榴花蒲葉一番新空勞尺素傳芳訊未得蒹葭倚玉人

自悟

病軀憔悴自咨嗟爲愛無生轉法華浮世寄身原似幻紅塵豈可認爲家

依韻寄答雲清夫人

爲阻香閨問春來幾許愁忽貽雲錦段遠自鳳皇樓落月轉相憶清詞何以酬澱湖千頃白有夢此淹留

七夕寄外

銀河浩浩月痕生殘暑初銷露漸盈迢遞佳期逢此夕李義山詩故教迢遞作佳期飄零羈客起遙情虛傳蘇蕙機中錦難博韓康市上名聽徹西泠珠絡鼓也應寂寞坐深更

讀王蘭泉舍人履二齋詩集作

浣手焚香誦幾回一開縹帙滿瓊瑰江東久唱驚人句殿上新標作賦才行在名試第一此去長安齊李杜他年興慶指元裴夫人許雲清亦工詩朱絲闌畝羅紋紙乞寫泥金萬本來

中秋

星稀河漢霽遙空三五良宵景不同秋色平分剛一半月華圓滿恰當中金風縹緲侵羅袂玉露霏微墮桂叢世界渾如水精域何須更羨廣寒宮

秋夕

高樓月白夜淒清翠幌香銷夢不成起步階前風
露冷征鴻一片送秋聲

西風蕭瑟入疎林遶砌寒蛩不斷吟寂寂清宵無
一事挑鐙重理舊瑤琴

秋日得端英表妹詩

空階疎雨滴梧桐寂寞蕭晨倚翠櫳正憶美人腸
宛轉忽傳新句玉玲瓏征鴻入塞翎猶白遠樹經
霜葉半紅秋意漸深愁更甚吮毫欲和愧難工

古織錦詞

塞雁將來燕欲歸金閨札札盡鳴機須知大漠風
霜早莫待秋深始寄衣

對月有懷雲清夫人

寒月光如凍泠然弄玉琴迢遙隔江水悵望少知

音道遠書頻滯才高詩自深花時雖有約

來書有
天桃花

放時敬造
妝樓之訂此夜思難任

冬怨

霜雪侵尋又逼年空閨靜夜轉淒然寒生刀尺裁
紈素凍合關山斷錦牋游子懸情孤雁外慈親慰

語一燈前比隣已是荒雞唱望遠踟躕未得眠

代書寄外

一自分飛後終朝鎖黛眉每嗟生計薄無那病魔
隨翠管何曾擲菱花幾去窺三時常伏枕經日不
舉帷未卜鷓鴣穩難逃斥鷃嗤世情蛇退嶺塵路
馬當祠莫雨瀟瀟候寒風瑟瑟時淒其添感慨岑
寂倍愁思旅况知侘傺羈懷定鬱伊安心宜淡泊
舉足慎欽嶽變態由人幻周防慄自持粗酬身事
了歸議鹿門期

冬夜有感

流年如矢冬將盡歲事闌珊百感侵滿鏡飛蓬臨
曉淚出門提甕半生心熏鑪香燼寒猶甚戍柝聲
沈夜已深愁緒牽縈眠不得聊將幽怨寫清琴

丁丑除夕

容易移駒隙年光又逼除庭陰殘雪冷屋角早梅
舒重理三冬句閑繙五印書清貧安若素井臼自
蓬廬

戊寅元旦

上日啟芳辰
瞳矐曙色新
卷簾呼倦婢
酌酒獻慈親
虛壑冰將解
方塘草漸勻
不知留滯客
可憶故園春

梅花

瓊姿隔歲又相逢
標格高寒孰與同
似夢如烟半庭月
浮香弄影幾番風
不因羌笛牽愁思
欲仗鉛華寫瘦容
聞說銅坑開漸滿
何時索笑向山中

雨窗

試鐙時已近
終日雨廉纖
嶺上蚤梅落
江頭春水

添懷人情脉脉
謂雲清夫人
愁我病懨懨
贏得書窗靜
焚香清夢恬

初春偶題

輕風習習入簾頻
淑氣初回景色新
林鳥弄晴才宛轉
池魚出水尚逡巡
梅心未坼愁如我
柳眼將舒劇可人
自此韶華無限好
但嗟銷瘦不禁春

偶至小園見玉梅
一本雜於榛蕪之中
喟然有感

冰作心兮玉作胎
仙姿只合植蓬萊
如何卻在荆

棹裏春雨春風憔悴開

絕世丰標出世仙含顰歛怨倍嫣然休嗟冷落無

知已彈入冰絲自可憐

琴曲有梅花引

和外武林客館見寄

娟娟風露莫江寬寂寞吟懷倚畫闌一自孤帆天際去冷猿秋雁夜窗寒

謁來青鳥隔窗鳴一幅雲牋寫別情聞到吳山翻閉戶茶烟經卷伴淒清

迢迢子夜夢難成重向寒窗對短檠最憶西泠獨

吟處山城遙遞短長更

筍輿蘭棹憶當年明聖湖頭景色妍載酒尋春春最好桃花如雨柳如烟

貧家生計日闌珊江上征人底日還明鏡刀環延佇久幾重春水幾重山

春曉登樓

金昌亭下草萋萋宿雨初晴曉日低染黛好山當畫閣揉藍新水漲清溪蝶酣花氣悠揚舞禽戀春風宛轉啼凝望武林親在遠不勝愁盼曲闌西

寒食

輕寒惻惻雨纖纖
彈指燒燈又禁烟
芳草芊綿迷巷陌
杏花撩亂撲秋千
時光流轉愁難了
風物清明病未捐
此景上河圖不盡
都將收拾入詩牋

惜春

底須根觸始生憂
意緒無聊不自由
漂泊藁砧歸未得
蹉跎駒隙去難留
侵階碧草萋萋長
墮地飛花點點稠
春老何關鶻鳩事
盡情啼殺樹枝頭

春日

繡倦鉤簾坐紗窗
日漸長衙蜂朝夕鬧
壘燕去來忙
芳草黏天碧
飛花撲戶香
可憐春似水
同調隔

瀟湘謂高表
姑母

習習午風生
修篁插短楹
春光渾引睡
意緒若含醒
不分梨花白
生增柳絮輕
縱無愁思者
對此亦傷情

落花

萬點風飄更黯然
西園一夜葬嬋娟
明春流轉風光處
慰我離愁又隔年

春莫遣興

綠陰庭戶春將去病起深閨一倚樓
點硯飛花初著雨當窗高竹預吟秋
已知身世原如幻何必昏朝只坐愁
結習唯餘詩筆在欲排溫李學應劉

春盡日

紅稀綠暗瑣窗前已近江南四月天
新竹籠烟高似屋圓荷滴水小於錢
風光半過窮愁日詩句多存惆悵篇
無計挽留春暫駐傷心一別動經年

送雲清夫人入都

頻年芳訊慰相思今見魚軒北上時
玉軸九霄青紫誥金荃一卷鳳皇詩
征帆瓜蔓初生水離緒楊花已亂絲
此去薊門烟樹遠素書延佇莫來遲

贈外舅母王太夫人

幾載閨中慕令名仙居咫尺阻重城
何時始得依瓊樹一聽鈞天鸞鳳聲

紛綸麗藻女相如繡罷含毫賦子虛
聞說綠窗髻几畔牙籤插架盡奇書

門第烏衣數大家高風玉映更無加
名花一朶移

天界知是前身萼綠華

閨秀江東傳綠淨新詩字字比驪珠鄉間復見真
風雅妝閣題襟許也無

蘭房寂寞少知音遠道飛瓊結素心

謂雲清夫人

何幸

翠樓通問易不須迢遞託仙禽

自題石欄點筆圖

小院梧桐漲綠陰高蟬風外曳清音暫來闌角數
裊坐袖拂新涼日欲沈

膚寸烟雲卷墨濤紅絲硯飽紫狸毫柔荑亦有千

鈞力琢句驚如切玉刀

秋花秋草更精神百態牢籠用意新比似劉家三
姊妹故應風雅屬天人

耽吟嗜古真成癖卻少姬姜爲友于安得焚香呼
卽出呈詩常向美人圖

苦雨

經旬梅雨積五月似涼秋霧暗參差樹烟沈遠近
樓挑鐙成短句倚枕感繁憂何日天開霽雙鳩語
不休

南樓吟稿卷上
三
雨不絕

簷前聲不息晨夕聽鳴泉非是邛都縣如何有漏天

半月風兼雨閉窗寂寞過三吳卑濕地多恐敗新禾

喜晴

風定雲輕天乍霽吱喳乾鵲向窗鳴焚香讀畫銷
閑晝試墨臨書喜嫩晴近檻新荷紅漸放小橋積
水綠初平凭欄縱目添幽賞遠翠娟娟繪不成

夏日閑居

鏡檻渾無暑氣侵幽居卻喜似山林松窗閒寫夫
人帖蘭閣還調中散琴新竹娟娟橫翠影疎蟬嘒
嘒曳清音曉來幾陣迎涼雨滿院荷香襲素襟

南樓吟稿卷上

南樓吟稿卷下

春日偶成

香溪 徐映玉 若冰

春風幾番闔閭城
根觸愁懷特地生
上計秦嘉仍落寞
禽聲花氣總傷情

草滿芳隄花滿蹊
濯枝雨過望中迷
宜人景物濃如許
小擘雲藍費品題

辛夷初謝海棠生
遙聽街頭喚賣飴
正是江南三月半
雨絲風片近清明

東風作厲最淒清每到春來太瘦生弱草輕塵雖
小悟落花飛絮引詩情

水國春深尙薄寒輕陰漠漠雨漫漫碧紗牕外鶯
聲老花事無端又欲闌

奉酬誠齋從父

一簾風雨眇愁余靜掩深閨意澹如何幸忽貽冰
雪句細吟堪敵百碑礫

新詩句句詞鋒勁畫壁旗亭夙擅場正值 明廷
招俊逸好將獻賦繼長楊

善病多愁詩思減綠窗子墨久踈蕪往來費盡桃

花紙媿殺江東說大家

叶姑
乎切

讀雲亭弟新咏

惠連才藻美詩筆跨長虹自是幽人作還兼國士
風堆槃珠錯落入掌玉玲瓏索我新詞和愁多愧
未工

沃田師寄示詩集

尺素何由達遠程春風夜雨隔江城今朝喜捧金
荃集如撥浮雲眼倍明

奉酬雲清夫人卽次見懷韻

客夏移蘭棹經年望玉河雲端飛一紙遠道慰蹉跎
相憶黃花節重吟白雪歌倚樓凝佇久秋盡雁聲多

吾廬雖近市終日閉柴關莫雨空庭樹深秋繞郭
山愁牽吟筆懶病使剪刀閑強韻無能和虛勞青鳥還

寂蔑音塵濶無從問女師

去浙日久與芷齋音問希闊

間關憑

遠夢惆悵把香詞

謂在璞堂集

阻以河山隔因之魚雁

遲閨檐同調少南北總縈思

秋夜有懷端英妹

西風瑟瑟雨纖纖冷雁哀蛩別恨添一自芳閨虛
錦札幾番清夢到香奩感懷洗句含愁得點鬢分
花帶笑拈往事無端勞想像支離病骨更厭厭

望鴻偶作

翩翩影度白雲遲可向天涯寄別思一片秋聲千
點淚碧欄干外立多時

同雲亭弟讀張澄川詩集

清音第一是邱琴芍藥新篇韻更深想見西窗香
欲爇月痕燈影伴孤吟

北郭南園彈指空方今幸覩出群雄論詩吾弟差
同調看掣鯨魚碧海中

與雲亭弟論詩

吾弟應徐亞才華溯建安高談蘇病骨健筆掃愁
端茗椀雲腴淡香鑪沈水殘翦燈堅坐久窗雨送
春寒

程氏園十詠

靜香春晝

偶來春榭內先入讀書堂用義山句曉色桃花嫩寒烟
柳帶長境幽堪覓句簾遠自含芳依檻徘徊久游
蜂度短牆

水亭坐雨

一雨能駢暑微風過小庭荷香連密竹蟬響咽前
汀涼入生衣爽清教熱惱醒漸看群動息烟外濕
飛螢

霜鐘度月

霜月一片白飛來何處鐘惺惺寒枕上隱隱遠山
中夢轉天將曉吟殘漏欲終懸知栖寂者塵慮頓
爲空

遠山眉嫵

遠峯何窈窕依約小眉山初雨螺痕濕斜陽黛色
斑疎林相掩映秋水自迴環惜乏河陽筆輕描翠
一灣

塢影斜陽

諸相皆爲妄高標起倚天況遮斜日外似立莫雲

邊阿育當如是慈恩亦偶然名園添寫望將暝刹
竿懸

遙村鶴唳

清唳中宵發蒼茫自水村知時能警露因勢好乘
軒華表曾留語浮邱可共論庭陰誇子和高拂鳳
巢痕

古檜龍蟠

老樹挈雲起閑庭勢化龍翠橫泉石畔鐵瘦雪霜
中天矯高枝秀蕭條萬木空終當與松柏離立在

芳叢

桂林秋曉

絕愛樺屏好空堂景最幽
丹明霜乍重黃染雪疑
流子落還依樹香濃欲送秋
劉安今不見初日足
夷猶

牆角風帆

葉葉飛牆外輕帆趁好風
滄波無近遠俄頃入長
空山轉千重翠霞橫一抹
紅往來皆幻影欲問主人翁

石室堆雲

白雲膚寸合一室抱蒼岑
善寫詩人態閑怡隱者
心青知春樹出紅漏夕陽深
妙墨圖難盡良游寄
短吟

奉和沃田師送春二絕句卽送之廣陵

櫻筍堆盤酒滿卮送春又遇送人時
桃花漲後江流急但願征帆北去遲
春光心事兩蹉跎愁見飛花檻外過
漫說窮愁詩便好算來詩不敵愁多

送雲亭弟應試鹿城

楊柳深深沙燕輕乍晴恰好放舟行
棟花風急春潮滿柔櫓聲中指鹿城

欲振家聲倚一經烟霄萬里鶴梳翎
同懷尤切青雲望吉語聽傳到謝庭

病甚承雲亭弟寓書慰問并寄長篇輒濡藥

汁亦成三十韻答之

空閨尠驩虞頻年嬰疾患

烏丸切

刀圭不去口巫覡

時在門十日一櫛沐蒙被動經旬逡巡將入夏寂

寞因送春雜花既以零新綠亦漸繁可惜芳菲時

風光殫愁人支離觸吾感轉側憎此身申旦幾交

睫竟夕曾無温况當困沈疴何堪嗟窶貧饔飧謀

瓶儲蓐炊視厨薪外憊車牛客內傷桑榆親顧際

艱難會乃營參苓錢我臯其伊何我心迫憂煎珍

重賴我弟至情均天倫

首楞嚴經我與阿難情均天倫

寓書相慰

問申以詩長箋上言勉忘憂下言勸加餐蟬連三

百字一字一拳拳摩抄幾回讀使我中怦然鍼線

久屏謝楮墨已唐捐自愧蓬心蒙曷報瓊枝妍我

非賈逵姊幼爲課典墳弟卻有韋覲茶孝邁前賢
其時梅子黃漫漫雨滿天
隄駛鳴屋角鶻鷂呼林
端質明錦段來昨宵鐙花鮮
頓教心神開坐見根
觸寬伸紙起吮毫徐拂硯
凹塵搜索勉成筆聊用
酌鴿原

病中遣興

玉鳧香爇月微明倚枕頻聽夜漏清
芳訊殷勤愁頓減
謂雲亭弟神方容易病差輕
謂正功吳醫鏡臺蟲網臨
妝嬾硯匣塵封得句生
從此擬除孤憤盡好同鷗

鷺結深盟

寄懷許雲清夫人

一自魚軒去相思日幾回
江梅今已發海燕又將來
經歲音塵斷何時懷抱開
懸知班謝句傳寫滿
蘭臺

婉婉東華第雲端望若仙
揮毫珠錯落鳴佩玉鏘
然三接恩光重雙飛靜好賢
殷勤緘尺素遠寄
潞河船

題虞山女史牡丹

深閨倦繡暈胭脂善學錢郎寫折枝第一冶情天
付與左家阿紫繫人思

錦幃綵繡日華鮮依約沈香亭子邊風景正當蠶
上簇畫闌晴午鬥茶天

妙墨徐熙與趙昌宣和舊譜付滄桑掃眉才子虞
山下畫手于今最擅場

貧家風味甘恬淡讀書偏從富貴看豈爲梅花太
孤冷欲呼姚魏破春寒

養疴雜咏

吟腰銷瘦髻如蓬憔悴相憐一鏡中小婢不知人
意懶摘花猶爲插釵叢

曉來行藥到迴廊宿疾初瘳怯嫩涼絕愛半池紅
菡萏昨宵得雨更生香

每嗟粗糲猶艱辦況說參苓豈易求幸得刀圭能
愈疾高堂差慰二親憂

病骨支離過一春惠連問疾獨殷勤書中珍重加
餐字錦段傳來意最真

病起幽懷更晏如熏香小閣自繙書紅泥鑪子茶

聲沸一醅新烹午睡餘

結習惟餘詩思饒文園書劍任飄蕭鹿車共挽平生願甘向田間理麥苗

幾番晴濕黃梅雨一段哀思白苧歌似此淒涼魂欲斷闌干倚冷奈如何

無心弄墨與捶琴林下何曾遇賞音獨有老梅堪結契一株孤冷壞牆陰

楞嚴一卷證無生悟徹旋教萬慮輕齒冷若蘭空織錦艱辛機杼未忘情

南樓養疾已經時排遣還成惆悵詞幾許幽憂誰會得繼聲端合屬連枝

酌誠齋從父

冷香數點瑣窗前人意風光異昔年芳訊忽傳名士句桃花爛漫八行箋

珍重欣貽絕妙詞小樓明月細吟時自憐病骨支離甚空愧瑤華欲和遲

梅花

高寒標格絕纖塵雨妬風狂枉損神多謝東皇巧

相護南枝依舊十分春

雲亭弟相訂論詩以雨不果賦此以寄

相期蠲屐竟蹉跎春雨春風作意過對爾經時驚
病減別來一日覺愁多芳辰漸閱壽陽候繡閣惟
吟白雪歌安得棣花連子舍擘牋分韻共研磨

送雲亭弟赴閩中

入春才幾日底事百憂新已歎連枝少偏嗟折柳
頻揚雄應奏賦王粲暫依人蚤遂淩雲志郵書慰
老親

閩海三千里孤帆徑欲行別離今異路悽愴有同
情燕到人方去鴻歸夢更驚池塘春草發懷抱與
誰傾

爲我愁兼病晨昏到草堂幾年池夢短今日嶺雲
長寂寂江梅白迢迢海日黃老親方在遠分手更
情傷

孔懷情素切此際漫丁寧吳越仍知近津梁舊慣
經淒涼盈缺月迢迢短長亭南去詩應勝閩山無
限青

南樓吟稿卷一
和錢塘方芷齋詠梅絕句

風來月上若含情
依約瑤姬過碧城
一種高寒好標格
濛濛遠望白雲平

石牀苔磴倚清酣
銷得幽人幾日譚
湖水繞花花入寺
無邊香界在江南

風雪前村開一枝
千秋絕調老僧詩
後來苦覓生香句
便是中峯也不知

不分侵曉與黃昏
隨意溪光更月痕
一片寒花迷近遠
幾番延佇爲銷魂

山家寂靜水村幽
翠羽嘈嘈不自由
河渚香連三十里
牽儂清夢去杭州

由來畫苑數元章
方外華光亦擅場
何似深閨參活句
獨將詩筆寫新妝

銅瓶小插疎枝好
玉笛低吹遠韻深
自笑珊瑚空架筆
幾曾會得美人心

秋月奉和六叔祖

清露盈庭濕金波
浸袂涼愁來頻點
筆篆冷更添香月
姊勞相伴秋宵一
任長琴絲能慰意
不必定

浮觴

西窗人語靜銀漏已將殘素魄穿疎箔清香沁廣
寒秋光何限好病緒轉難寬卻羨窮經叟更闌卷
尙攤

高空懸一鏡相望可憐生翠簟渾無暑青梧似有
聲坐看清影轉不覺曉鐘鳴夜色真幽絕堪吹子
晉笙

秋夜對月有懷雲亭弟及端英妹

樹疎雲斷沈寥天夜漏將終倦未眠鐵馬當檐鳴

慘切銀鐙背壁影淒然思君立盡清宵月憶妹吟
殘研粉牋羨殺長空鴻雁好江南江北任聯翩

雲亭弟在閩作此寄懷

桑蓬雖遂男兒志岷岵遙瞻思不禁堂上冀紆黃
髮望天涯宜慰白雲心歲時致問仍如昨涼燠相
關更自今一語爲傳吾弟曉懿親宿昔本來深

和雲亭弟秋夜見懷韻

瑟瑟西風動遠林疎簾虛牖薄寒侵懷人時抱三
秋思把卷深知千古心好句何殊池上作蕪辭難

同樓賦和卷
繼郢中吟添香靜夜無排遣分付青衣理素琴
惠連才藻噪詞場杜若幽蘭字字香聚散已同雲
不定聯翩空羨雁成行玉堂芸閣雖堪慕槃澗岩
阿未可忘且向層霄酌宿志續紛彩筆蚤傳芳
苦雨有懷雲亭弟喜耀呈弟至書此示之
幽懷正愁絕簷溜轉泫泫聽久思兄弟懷深感昔
今幾多蕭瑟意何限別離心卻喜壘篋在休嗟乏
賞音

病起示外

卧疾經年擬不瘳新人來坐舊妝樓如何竟得刀
圭力又向芸窗咏四愁

壬午暮春送雲亭弟之秦中

一門群從內惟爾最知音又作東西別應傷去住
心去春遊
閩中思艱吟不續道遠夢難尋何日重聯袂
壘篋蒼素琴

佐幕前賢事良材琢始成難勝兒女態祇爲弟兄
情忍折樓頭柳慵聽葉底鶯可憐愁病裏又欲送
西征

望望秦關遠知君念老親千山圍紫塞一騎走黃
塵隴樹寒猶葉邊沙暖不春酸辛屺岵詠莫慰倚
問人

歸信知何日歌驪淚濕衿低徊珍重語宛轉別離
心驛路催征騎秋風盼好音并書得意句驅我病
魔侵

雲亭弟重客秦中寄此懷之

去年花下賦驪歌手挽長條喚奈何腸斷別離今
又再劉繪詩云別離安
可再而我更重之淚痕應較雨絲多

遙傳魚素慰予愁卧疾經年得漸瘳從此風雲憑
變幻已將身世付悠悠

春風春雨滿征衣鷓鴣聲繁鶯語稀一路錦囊詩
縱好只應愁見落花飛

此去臯蘭萬里長吳雲秦樹遠相望刀環消息知
何日珍重秋來雁幾行

次韻奉酬誠齋從父

問疾頻煩到小堂往來銀鹿更奔忙窗臨風雨孤
鐙暗門掩蓬蒿三徑荒徒向經中求佛力浪傳海

上得仙方新詩餉我如冰雪一條貧家熱惱腸

次雲亭寄懷韻

雁行分萬里望望獨浴嗟屢得瑤華問轉教離思
加縹緗君歲月藥石我生涯辛苦飄蓬客虛憑夢
到家

永日

永日荒齋裏留香不卷簾蕭閑抄木序檢點到牙
籤銜蕊蜂窺戶尋巢燕語檐頻年嗟水儉容易飽
齏鹽

悟徹中邊後身心已泊如鉛華收畫篋墨瀋滴方
諸偶勘三蒼字還繙七錄書尚餘結習在拈弄未
能無

次蘭畹顧姑丈秋登月滿樓韻

滿眼清光倚小樓欲邀月姊話閑愁坐看明鏡飛
珠箔好擘香牋咏玉鉤衣杵一城驚斷夢風烟萬
里入高秋茫茫東去胥江水極目銀濤起白鷗

病起呈誠齋從父

卧病深閨半載餘愁苗難割恨難舒何當長者車

頻過更贈新篇七發如

風定紗窗月入林空齋夜靜浣塵襟藥鑪灰陷茶
鐺冷倚枕猶爲長短吟

柳色青青送去帆

謂雲亭弟

遠書欲寄泪同緘應知雨

暗西窗夜群從關心是阿咸

春鷓秋蟀總愁吟無米爲炊更苦心鍼線懶拈書
亦廢近來陶寫賴青琴

中秋對月作

今夕是何夕蟾光爾許佳坐來忘永夜吟罷憶同

懷老桂香浮幔疎桐影上階仲宣如念遠離思亦
難排

追輓葉孺人

骨冷香銷三十年夜臺紫玉久爲烟藁砧追悼情
難已一數芳踪一惘然

鴻案相莊伉儷深當時學古有同心牙籤插架添

新軸辛苦閨中刺繡針

芸亭先生喜聚書孺人以女紅佐之

兒女緣慳歎竝傷良苗不實感董節如何庾信傷

心賦併洒安仁淚萬行

孺人有一子一女俱殤

一編楚些譜遺馨琬琰長留奉典刑縱使芳魂招
不返年年光氣動須星

先生彙刻悼公及諸名宿輓詩

秋莫有懷雲亭弟

久病初瘳百慮灰曲闌倚冷獨徘徊望中秋色如
人瘦塞上音書何日來桐實半庭經雨落菊花滿
徑傲霜開可知遠道思鄉者不聽邊鴻賦亦哀

余嬰疾纏綿篇章久謝雲亭弟每貽新咏索

和頻仍勉爲繼聲不可云詩也

夕陽衰柳咽鳴蟬秋去秋來又一年飛絮落花愁

裏度鉛華芳澤病來捐已拚含恨過身世忍更移
情向簡編多謝惠連頻索和豈知焚硯類枯禪

從弟耀呈嘉禮

簫聲迢遞下層樓喜聽金昆遂好逐群從門中多

俊逸一時前馬更無儔

見儀禮

何用雕香作繡鞍

見鐵圍山叢談

同牢長共百年歡比肩

願似天邊月從此光盈只見圓

弟成昏在上弦前一日

花燭良辰恰小春天桃灼灼上頭新二南風美閨
門始宜室宜家慰老親

瓊筵雙勸玉交杯
噴羨新人咏絮才
不獨蘋蘩欣
有託石麟會見自天來

曉寒懷雲亭弟

滿地霜華入戶寒
寒帷欲起觸愁端
怪他曉角淒
還斷似訴征人行路難
天末迢迢去雁孤
邊城九月雪鑄膚
懷中縱有生
花筆寫得鄉思一半無

鐙花

晚妝才罷獨徘徊
舊恨新愁撥不開
蘭燼含花綠

底事可能遠道有書來

夢

愁腸百結爲連根
緗素何心去討論
欹枕乍回池
上夢一聲斷雁喚吟魂

表姑張鳳英花燭詞

結帨施巾姆訓餘
宵衣初著上香車
見儀禮千枝密
炬光如晝盡說仙人降碧虛

溫燉最好小春天
霜氣初乾花氣鮮
芳塢黃梅開
更早添妝插向翠翹妍

南樓與和卷一
六
璚瑁筵頭合盃時玉簫徐引鳳凰遲新郎聞道多才藻自寫烏絲卻扇詩

女史箴兼幼婦碑珊瑚架筆慣臨池禮成已是三商後和就催妝月影移

洞房銀漏坐逡巡侍女香添心字頻鏡檻明朝傳韻事麝煤替畫遠山春

宜家從此奉蘩蘋寶髻流珠梳裏新更把玉溪詩寫贈錦帷初卷衛夫人

誦芬樓詩用謝康樂登池上樓韻

高樓縱負攬微風送遐音漉漉圓景浮依依斜陽沈主人蕭且閒群雅媿以任安排琴尊具遊戲翰墨林幽興出入表良時快一臨江流旣明瑟山態亦岑嶽卉木媚深秀烟雨冒層陰容與起汀鷗回翔下臯禽往來多勝引遠近有清吟願以作者意仰窺靜者心詠絮慚似昔誦芬請從今

壽從大母王太君五十

光碧堂中第一仙自占鳳卜慶聯綿乍看設帨簪裾會旋見含飴湯餅筵綵綫漸添長景後瓊枝已

坼早春前誠齋從父于小春月得子從今東父偕西母共食蟠桃萬萬年

題月滿樓再次原韻

娟娟蟾影下層樓但倚闌干便浣愁端正出雲瑩若鏡微茫當牖曲於鉤庾公雅興常宜夜謝客吟情半爲秋況是五湖清可掬涼波萬頃起眠鷗

月下探梅有感

襟期恬淡少知音剩有中庭白雪心瘦影最宜晴後看冷香好向月中尋不知清韻誰能擬惟覺幽

懷對此深只恐移根歸上苑相思空費短長吟

范靜川姑丈之官梅州大人偕行入粵送別

抒思奉呈四首

雙流分贛石一徑入梅州捧檄從茲去抽帆溯上游春江經雪漲高嶺出雲浮正值風光好繁花送客舟

萬里南征路相從託老親艱辛經嶺海顛顛走風塵弱息終何補叮嚀空自頻劉盧情素切不必定平津

丹荔離離實紅綿豔豔花荒墟山客市小艇蜚人
家巡徼三河重衝繁百里加側聽光六計譽問起
天涯

憶寓西泠日君方宦會稽往來成昨夢詩句記前
題今向潮梅遠相望雲樹迷錦鱗三十六最盼是
香溪

南樓吟稿卷下



漢 韜 借 存 集

